

Nama Reti Pengidup?

BAGI KE DUA

Tanya #1: Ari Ni Asal Penatai Kitai Mensia?

Belabuh ari kitai ada nyentuk ka kitai nyadi aki orang, runding kitai semina deka idup aja. Bekereja ngiga utai empai, dikena meli gari, rumah enggau belanja bukai. Mayuh kitai enda nemu nama reti kitai patut idup ba dunya tu. Bisi mensia enda mereti, bisi mensia mereti tang enda nemu sekali ka utai nya amat.

A. Ari ni asal penatai pun pengidup?

Mayuh orang ka pandai tinggi pelajar, baka bala saintis suah amat ngena runding ka salah madah ka pasal asal penatai utai idup nyengkaum kitai mensia.

- i. Sida madah utai idup nyadi datai ari 'evolusi organik' (organic evolution); utai idup ti mit (amoeba), betukar nyadi sebengkah utai idup (simpler life form) ka ulih dipeda enggau mata kasar, udah nya nyadi besai, nyadi mensia enggau bansa jelu? Tang teori tu enda ulih dikamat ka, lalu enda mega ulih nerang ka utai nya enggau silik.
- ii. Dipansik enggau dalam utai ti idup endang nyadi ari utai ti amat idup. Mensia endang datai ari mensia, bakanya mega jelu endang datai ari jelu.

Ditu kitai manding ka Teori Charles Darwin; Mensia datai ari kera. Kati kitai tu sabaka enggau kera? Nyadi utai nya nadai ulih meri kitai penerang ti silik sereta chukup nyenggala.

- iii. Nama kebuah, bala saintis enda tetemu ka utai ti bendar? ³³*Naka meh pemesai pengeraja Allah Taala! Naka meh penalam penemu enggau runding IYA! Sapa ti nemu nerang ka peragam IYA? Sapa ti mereti ka jalai IYA? ³⁴Munyi ti disebut dalam Bup Kudus; Sapa ti nemu ati TUHAN? Sapa ti ulih ngajar IYA? (Rome 11:33-34).* Nadai siku mensia ulih mereti ka penalam penemu Allah Taala. IYA nadai berutang ba kitai mensia pasal penemu enggau runding. Laban Allah Taala siku aja ti Pengaga semua utai, baik ka nya dipeda enggau enda dipeda. Pengujong iya semua mensia bepanggai penemu ba IYA siku aja. Nya ti ngujong ka orang ti pandai enda ulih mereti ka pengawa dikereja TUHAN, Laban *"TUHAN bisi kuasa ngeletak maya penyadi semua utai. Iya ngasuh kitai keras ati deka nemu utai ti deka nyadi ka dudi hari, tang Iya enda kala ngasuh kitai mereti ka pengawa ti dikereja Iya"* (Pengajar 3:11). *"...Nya ti ngujong ka sida ti bepenemu deka pulai jadi enda mereti, lalu semua pemandai sida nadai pulai ka penguntong"* (Isaiah 29:14).
- iv. Nyadi lebu kitai agi betalat ka ari ni asal penatai pun pengidup, ditu Jesus madah ka kitai. *"Aku tu meh JALAI, PEMENDAR enggau PENGIDUP; nadai siku orang ulih datai ngagai Apai enti enda ulih Aku."* (John 14:6). Jesus aja jalai kitai tau nemu reti pengidup, laban Iya Tuhan sereta mega Mensia. Ulih kaul pengidup kitai enggau Iya, ari nya kitai ulih nemu Allah Taala, ianya IYA ti pun pengidup.

Ari genteran jaku Jesus ba John 14:6, tau disimpul ka bakatu;

1. JALAI; Semina Jesus aja jalai kitai ngagai Apai ti pun pengidup.

Nama Reti Pengidup?

2. PEMENDAR; Tu utai ti amat nyata pasal semaya / janji Allah Taala pasal pengidup ti bendar.
3. PENGIDUP; Jesus bejantil ka kuasa Tuhan Iya enggau kitai semua, ari diatu datai ka belama iya awak ka pengidup nya ulih nyata dalam kitai ti arap ka Iya..

B. Nama kebuah kitai mensia jauh badas (unik) ari semua jelu?

Kitai mensia ngembuan ulah enggau pendiau ka jauh bebida ari semua jelu ti idup ba dunya tu.

- i. Mensia nemu belagu, bepantun, negelala utai ti manah enggau jai, nemu nulis, pandai ngira, nemu betukang ngaga rumah, ngaga kereta, ngaga bilun, ngaga kapal, mensia nemu bepekit enggau pangan diri.
- ii. Tang jelu enda ulih nunda gaya pengidup kitai mensia. Nama kebuah mensia ngasai ka diri tau gesal ka ulah jai, nemu macha, nemu muji enggau nyembah Tuhan.
- iii. Nya alai mensia ukai datai ari evolusi, tang endang bisi orang ngaga kitai, nya kebuah kitai bisi ba dunya tu.

C. Bup Kudus nerang ka enggau bendar asal penatai kitai mensia.

- i. **(Pemungkal 1:1-30; Pemansut 20:11,)** Allah Taala ngaga langit enggau dunya dalam timpuh pengelama enam hari nyengkaum kitai mensia. Nyadi Allah Taala tu endang udah bisi sebedau dunya digaga, IYA ti endang idup belama iya, IYA endang chukop besai penemu, Pemadu Tinggi enggau Pemadu Bekuasa. IYA ngaga;
 - 1) Hari ke-Terubah; Dunya enggau langit; penampak [siang] enggau pemetang [malam] (P'kal 1:1-5). MANAH!
 - 2) Hari ke-Kedua; Ai disapat dibagi dua, ai dibaruh langit di atas. (P'kal 1:6-8). MANAH!
 - 3) Hari ke-Tiga; Ai (tasik) diserara ka enggau tanah (darat); semua bansa utai tumbuh – utai ti beleka enggau utai ti bebuah. (P'kal 1:9-13). MANAH!
 - 4) Hari ke-Empat; Penampak (terang) tumbuh dilangit, dikena ngelai siang enggau malam; dikena madah ka maya hari enggau maya taun – musin. (P'kal 1:14-19). MANAH!
 - 5) Hari ke-Lima; Semua utai idup ti terebai baka burung, macham jelu enggau ikan ba tasik. (P'kal 1:20-23). MANAH!
 - 6) Hari ke-Enam; Semua bansa jelu enggau utai ti idup ba darat; Mensia digaga sabaka enggau gamal (neladan ulah enggau runding) TUHAN. Mensia diberi kuasa atas semua utai ti idup – ba langit, di darat enggau ba ai – tasik.(P'kal 1:24-31). MANAH BENDAR!
- ii. Nya meh gaya Allah Taala ngaga semua utai di dunya enggau di langit. Mensia digaga Allah Taala dalam gamal IYA enggau neladan gamal IYA, **(Pemungkal 1:26-27)**, ukai sabaka enggau jelu, laban semua macham jelu endang digaga IYA kadiri ari **(Pemungkal 1:20-25)**. Kitai berati ka ditu ba **baris 26**; '*ngaga mensia dalam gamal (imej) KITAI - TUHAN, baris 27*'; '*neladan*' KITAI.
 - a) Dalam (sabaka enggau) gamal (imej) KITAI – baris 26; Utai ti nyenggala ditu, Allah Taala enda ngaga kitai betul-betul sabaka enggau IYA, laban TUHAN, nadai ngembuan tubuh baka kitai (**John 4:24**). IYA endang TUHAN, ti

Nama Reti Pengidup?

Pengaga semua utai, ti Pemadu Bakuasa. Utai ti bendar ianya, kitai tu dikena IYA mandang ka tauka nunjok ka mulia IYA.

- b) Sekeda ngasai ka kebuah mensia sabaka enggau gamal Allah Taala ianya; mensia nemu engkebang, nemu bejaku, tauka nemu ngemansang ka diri empu. IYA meri kitai bisi pengeleboh (ngelala enggau nemu mayuh utai) ti mandang ka ulah TUHAN ti dalam kitai baka, pengerindu, pengeliat ati, bisi pemaik, pengampun enggau taluk.
 - c) Tang ulih Jesus empu, penerangnya ulih ditemu enggau silik agi, Iya endang datai ari Apai sereta sama saum enggau Apai, (**John 7:29**). Laban Tuhan Jesus kitai sabaka gamal mensia, nya alai nya nunjok ka imej TUHAN tu sama bisi dalam mensia. Kitai mensia sabaka enggau Jesus empu. Kristus datai baka mensia dikena mandang ka penampak enggau mulia Allah Taala (**Hebrew 1:3**). Laban kitai mensia tu di gaga dikena nunjok ka kuasa TUHAN endang nadai endur alai kitai ulih nyema. Kitai mensia digaga 'unik' ari semua bansa utai ti bisi idup dalam dunya tu. Kitai mensia ngembuan pemandai, penemu, pemintar, pengelandik, penau, nemu ringat, bisi penyinu, mereti ka pengelantang enggau mayuh agi ka bukai.
 - d) Neladan KITAI – baris 27; Allah Taala ngaga mensia, indu enggau lelaki neladan gamal IYA. Tu ukai madah ka reti, indu tauka lelaki digaga neladan gamal TUHAN, lebih manah ari pangan diri. Terubah kalia ditulis dalam Bup Kudus madah ka indu enggau lelaki endang utai ti pemadu iya digaga Allah Taala. Nadai disebut lelaki ti lebih ari indu, tauka indu kurang agi ari lelaki, semua sama-sama nadai lebih enggau nadai kurang ari pangan diri.
 - e) Mensia semina mimit baruh ari bala serega. Disalin ari jaku Hebrew, iya nya '*bala malikat*'- NKJV), (**Masmor 8:5**). Nya ti nunjok ka kitai mensia tu amat berega ba TUHAN.
- iii. Bup (**Isaiah 40: 26, 28**) madah ka Kuasa Allah Taala; Nengkadah ka langit! Sapa ti ngaga bintang ti dipeda kita? Kuasa IYA endang besai. Allah Taala ti meruan belama; IYA ti ngaga semua dunya, lalu nadai siku ti mereti ka pikir IYA.

Udah abis tu peda BAGI KE TIGA – Nama Tuju/Kebuah Mensia Bisi Ba Dunya Tu?